



Šest uhapšenih za ratne zločine

Pripadnici **SIPA** uhapsili su osumnjičene za zločine počinjene u selu Jošanica kod Foče tokom 1992, kada je ubijeno 56 osoba srpske nacionalnosti

Kako je jučer saopćeno iz Tužilaštva BiH, na području Sarajeva i Goražda uhapšeno je šest osoba koje su pod istragom zbog ratnog zločina počinjenog u selu Jošanica kod Foče, u decembru 1992, kada je ubijeno 56 žrtava srpske nacionalnosti, pretežno civila, među kojima je bilo i žena i djece.

Tokom napada izvršeni su paljevinje i uništavanje kuća i imovine, a žrtve su nakon zločina pronađene i identificirane.

"Osumnjičeni se terete da su, kao zapovjednici i pripadnici Višegradske

brigade Armije RBiH, učestvovali u napadu na selo i počinjenju zločina nad stanovništvom", navodi se u saopćenju.

BIRN je ranije objavio analizu o neprocesuiranom zločinu koji se desio na Nikoljdan, 19. decembra 1992, kada je ubijeno više od 50 osoba srpske nacionalnosti, među kojima troje djece - dvoipogodišnja Danka, desetogodišnja Dragana i sedmogodišnji Dražen.

Dušanka Višnjić-Lalović imala je 17 godina kada je preživjela napad u kojem su joj ubijeni otac i tetka.

- Ja molim sud i tužilaštvo da izvade predmet iz ladice i da ljudski to odrade, ako ni zbog čega drugog, onda zbog troje djece, rekla je ranije Višnjić-Lalović za BIRN.

Na vijest o hapšenju za zločine u Jošanici u telefonskom pozivu kazala je da očekuje pravdu.

- Sjećanja ne blijede iako je prošlo 30 godina. Očekujem ovozemaljsku pravdu za počinioaca ubistva djece, dvije kompletne porodice Višnjić Stojke i Višnjić Vukadina, za 12 bračnih parova, za 21 ženu, navela je Višnjić-Lalović.

Glasnogovornik državnog Tužilaštva Boris Grubešić za BIRN nije mogao reći imena uhapšenih osoba, ali, nezvanično, radi se o Sakibu Čakaru, Šefiku Glušcu, Muhamedu Liski, Rašidu Sobi, Izetu Sejdiću i Murizu Hadžiahmetoviću.



Uhapšeni su bivši pripadnici ARBiH